

攝大乘論

下

二百四十五  
日十

49224





攝大乘論卷下十

陳天竺三藏真諦於廣州譯

入因果修差別勝相第五

如此已說入相因果勝相云何應知入因果  
修差別由十種菩薩地何者為十一歡喜地  
二無垢地三明焰地四燒然地五難勝地  
現前地七遠行地八不動地九善慧地  
雲地云何應知以此義成立諸地為十為對  
治地障十種無明故於十相所顯法界有十  
種無明猶在為障何者能顯法界十相於初  
地由一切遍滿義應知法界於二地由最勝  
義於三地由勝流義於四地由無攝義於五





地由相續不異義於六地由無染淨義於七地由種種法無別義於八地由不增減義於九地由定自在依止義由十地由業自在依止義由智自在依止義於十地由業自在依止義由施羅尼門三摩提門自在依止義應知法界此中說偈

遍滿最勝義

勝流及無攝

無異無染淨

種種法無別

不增減四種

自在依止義

業自在依止

揔持三摩提

如此二偈依中邊分別論應當了知復次此無明應知於二乘非染汙於菩薩是染汙云何初地名歡喜由始得自他利益功能故云



何二地名無垢此地遠離犯菩薩戒垢故云  
何三地名明焰由無退三摩提及三摩提依  
止故大法光明依止故云何四地名燒然由  
助菩提法能焚滅一切障故云何五地名難  
勝真俗二智更互相違能合難合令相應故  
云何六地名現前由十二緣生智依止故能  
令般若波羅蜜現前住故云何七地名遠行  
由至有功用行最後邊故云何八地名不動  
由一切相及作意功用不能動故云何九地  
名善慧由最勝無礙辯智依止故云何十地  
名法雲由緣通境知一切法一切隨羅尼及  
三摩提門為蔽故譬雲能覆如虛空塵障故

能圓滿法身故

云何應知得諸地相由四種相一由已得信  
樂相於一一地決定生信樂故二由已得行  
相得與地相應十種法正行故三由已得通  
達相先於初地通達真如法界時皆能通達  
一切地故四由已得成就相此十地皆已至  
究竟修行故云何應知修諸地相諸菩薩先  
於地地中修習奢摩他毗鉢舍那各有五相  
修習得成何者爲五一集摠修二無相修三  
無功用修四熾盛修五不知足修應知於諸  
地皆有此五修此五修生五法爲果何者爲  
五一剎那剎那能壞一切麁重依法二能得



出離種種亂想法樂三能見一切處無量無  
分別相善法光明四如所分別法相轉得清  
淨分恒相續生爲圓滿成就法身五於上品  
中轉增爲最上上品因緣聚集於十地中修  
十波羅蜜隨次第成於前六地有六波羅蜜  
如次第說於後四地有四波羅蜜一漚和拘  
舍羅波羅蜜六波羅蜜所生長善根功德施  
與一切衆生悉令平等爲一切衆生迴向無  
上菩提二波尼他那波羅蜜此度能引攝種  
種善願於未來世感六度生緣故三婆羅波羅  
蜜由思擇修習力伏諸波羅蜜對治故能引  
六波羅蜜相續生無有間缺四若那波羅蜜

此度是能成立前六度智能令菩薩於大集  
中受法樂度成熟衆生後四波羅蜜應知是  
無分別後智攝一切波羅蜜於一切地中不  
同時修習從波羅蜜藏經應知此法門廣顯  
諸義於幾時中修習十地正行得圓滿有五  
種人於三阿僧祇劫修行圓滿或七阿僧祇  
劫或三十三阿僧祇劫何者爲五行願行  
地人滿一阿僧祇劫行清淨意行人行有相  
行人行無相行人於六地乃至七地滿第二  
阿僧祇劫從此後無功用行人乃至十地滿  
第三阿僧祇劫復次云何七阿僧祇劫地前  
有三地中有四地前三者一不定阿僧祇三



定阿僧祇三授記阿僧祇地中有四者一依  
實諦阿僧祇二依捨阿僧祇三依寂靜阿僧  
祇四依智慧阿僧祇復次云何三十三阿僧  
祇方便地中有三阿僧祇一信行阿僧祇二  
精進行阿僧祇三趣向行阿僧祇於十地中  
地地各三阿僧祇謂入住出如此阿僧祇修  
行十地正行圓滿、  
有善根願力 心堅進增上 三種阿僧祇  
說正行成就

攝大乘論依戒學勝相第六

如此已說入因果修差別云何應知依戒學  
差別應知如於菩薩地正受菩薩戒品中說

若略說由四種差別應知菩薩戒有差別何者爲四一品類差別二共不共學處差別三廣大差別四甚深差別品類差別者有三種一攝正護戒二攝善法戒三攝衆生利益戒此中攝正護戒應知是二戒依止攝善法戒是得佛法生起依止攝衆生利益戒是成熟衆生依止共學處戒者是菩薩遠離怖罪戒不共學處戒者是菩薩遠離制罪所立戒此戒中或聲聞是處有罪菩薩於中無罪或菩薩是處有罪聲聞於中無罪菩薩有治身口意三品爲戒聲聞但有治身口爲戒是故菩薩有心地犯罪聲聞則無此事若略說所有



身口意業事能生衆生利益無有過失此業  
菩薩皆應受學修行如此應知共不共戒差  
別廣大差別者應知有四種由四種廣大故  
一種種無量學處廣大二能攝無量福德廣  
大三攝一切衆生利益安樂意廣大四無上  
菩提依止廣大甚深差別者若菩薩由如此  
方便勝智行殺生等十事無染濁過失生無  
量福德速得無上菩提勝果復次有變化所  
作身口業應知是菩薩甚深戒由此戒有時  
菩薩正居大王位或現種種逼惱衆生爲安  
立衆生於戒律中或現種種本生由逼惱他  
及逼惱怨對令他相愛利益安心生他信心

爲先後於三乘聖道中令彼善根成熟是名  
菩薩甚深戒差別由此四種差別應知是略  
說菩薩受持戒差別復次由此四種差別更  
有差別不可數量菩薩戒差別如毗那瞿沙  
毗佛略經中說

攝大乘論依心學勝相第七

如此已說依戒學差別云何應知依心學差  
別略說由六種差別應知何者爲六一境差  
別二衆類差別三對治差別四隨用差別五  
隨引差別六由事差別境差別者由緣大乘  
法爲境起故衆類差別者大乘先三摩提集  
福德王三摩提賢護三摩提首楞伽摩三摩



提等攝種種三摩提品類故對治差別者由緣一切法爲通境智慧如以楔出楔方便故於本識中拔出一切麤重障故隨用差別者於現世久安住三摩提樂中如意能於勝處受生隨引差別者能引無礙神通於一切世界由事差別者令動放光遍滿顯示轉變往還促遠爲近轉麤爲細變細爲麤令一切色皆入身中似彼同類入大集中或顯或隱具八自在伏障他神力或施他辯才及憶念喜樂或放光明能引具相大神通能引一切難行正行以能攝十種難修正行故何者爲十  
一自受難修自受菩提善願故二不可迴難

修由生死衆苦不令退轉故三不背難修由  
衆生作惡一向對彼故四現前難修於有怨  
衆生現前爲行一切利益事故五無染難修  
菩薩生於世間不爲世法之所染故六信樂  
難修行於無底大乘能信樂廣大甚深義故  
七通達難修能通達人法二無我故八隨覺  
難修諸佛如來甚深不了義經能如理判故  
九不離不染難修不捨生死不爲生死染汙  
故十加行難修諸佛如來於一切障解脫中  
住不作功用能行一切衆生利益事乃至窮  
生死後際樂修如此加行故於隨覺難修諸  
佛如來說不了義經其義云何菩薩應隨理



覺察如經言云何菩薩不損一物不施一人  
若菩薩善能行施無量無數於十方世界修  
布施行相續生起云何菩薩樂行布施若菩  
薩不樂行一切施云何菩薩行信施心若菩  
薩不行諸佛如來信心云何菩薩發行布施  
若菩薩於布施中不策自身云何菩薩恒  
戲布施若菩薩無布施時云何菩薩能於  
施若菩薩於施離娑羅想云何菩薩於施清  
淨若菩薩鬱波提貪恡云何菩薩能住於施  
若菩薩不住究竟後際云何菩薩於施自在  
若菩薩於施不得自在云何菩薩於施無盡  
若菩薩不住無盡中如施經於戒乃至般若

如理應知復有經言云何菩薩行殺生若菩  
薩有命衆生斷其相續云何菩薩奪非他所  
與若菩薩自奪非他所與衆生云何菩薩行  
邪淫若菩薩於欲塵起邪意等云何菩薩能  
說妄語若菩薩是妄能說爲妄云何菩薩行  
兩舌若菩薩恒在極空寂處云何菩薩能  
住波留師若菩薩住所知彼岸云何菩薩能  
說不相應語若菩薩能分破諸法隨類解釋  
云何菩薩行阿毗持訶婁若菩薩數數令自  
身得無上諸定云何菩薩起憎害心若菩薩  
於自他心地能害諸惑云何菩薩起邪見若  
菩薩一切處遍行邪性如理觀察復有經言



佛法甚深何者甚深此論中自廣分別一切  
佛法常住為性由法身常住故一切佛法皆  
斷由一切鄣皆斷盡故一切佛法生起為性  
由化身恒生起故一切佛法能得為性能得  
共對治衆生八万四千煩惱行故一切佛法  
有欲為性有欲衆生愛攝令成自體故一切  
佛法有瞋為性一切佛法有癡為性一切佛  
法凡夫法為性一切佛法無染著為性成就  
真如一切障不能染故一切佛法不可染著  
諸佛出現於世非世法所能染故是故說佛  
法甚深為修行波羅蜜為成熟衆生為清淨  
佛土為引攝一切佛法故菩薩三摩提業差

別應知

攝大乘論依慧學勝相第八

如此已說依定學差別云何應知依慧學差別由無分別智自性依止緣起境界相貌立救難攝持伴類果報等流出離究竟行善加行無分別智後得智功德無差別加行無分別後得智譬威德無功用作事甚深義故應知依慧學差別由依慧學差別應知無分別智差別無分別智自性應知離五種相五相者一離非思惟故二離非覺觀地故三離滅想受定寂靜故四離色自性故五於真實義離異分別故是五相所離智此中應知是無



分別智於此中如所說無分別智性中故說  
偈言

諸菩薩自性

五種相所離

無分別智性

於真無分別

諸菩薩依止

非心非非心

是無分別智

非思疾類故

諸菩薩因緣

有言聞熏習

是無分別智

如理正思惟

諸菩薩境界

不可言法性

是無分別智

二無我真如

諸菩薩相貌

於真如境中

是無分別智

無相無差別

相應自性義

所分別非他

字字相續故

由相應義成

離言說智慧

於所知不起

於言不同故

一切不可言

諸菩薩攝持

是無分別智

此後得行持。為生長究竟

諸菩薩伴類

說是二種道

是無分別智

五度之品類

諸菩薩果報

於佛二圓聚

是無分別智

由加行至得

菩薩等流果

於後後生中

是無分別智

由展轉增勝

諸菩薩出離

得成相應故

是無分別智

應知於十地

諸菩薩究竟

由得淨三身

是無分別智

至勝自在故

不染如虛空

此無分別智

種種重惡業

由唯信樂故

清淨如虛空

此無分別智

解脫一切障

由得及成就

如虛空無染

是無分別智

若出現於世

非世法所染

如癡求受塵

如癡正受塵



如非癡受塵

三智譬如此

如愚求受塵

如愚正受塵

如非愚受塵

三智譬如此

如五求受塵

如五正受塵

如非五受塵

三智譬如此

如未識求解

如讀正受法

如解受法義

次第譬三智

如人正閉目

無分別亦尔

如人正開目

後得智亦尔

如空無分別

無滌礙異邊

如空中色現

後得智亦尔

譬摩扈天鼓

無思成自事

如此不分別

種種佛事成

非此非非此

非智非非智

與境無差別

智名無分別

佛說一切法

自性無分別

所分別無故

彼無無分別

此中無分別有三種一加行無分別二無分別智三無分別後智加行無分別有三種謂因緣引通數習力生起差別故無分別智亦有三種謂知足無顛倒無戲論無分別差別故無分別後智有五種謂通達憶持成立相雜如意顯示差別故為成立無分別智復說別偈

餓鬼畜生人

諸天等如應

一境心異故

許彼境界成

於過去未來

於夢二影中

智緣非有境

此無轉為境

若塵成爲境

無無分別智

若此無佛果

應得無是處

得自在菩薩

由願樂力故

如意地等成



得定人亦介。成就簡擇人。有智得定人。於內思諸法。如義顯現故。無分別修時。諸義不顯故。應知無有塵。由此故無識。此無分別智即是般若波羅蜜名異義同。如經言若菩薩任般若波羅蜜由非處修行能圓滿修習所餘波羅蜜何者非處修行能圓滿修習所餘波羅蜜謂離五種處一離外道我執處二離未見真實菩薩分別處三離生死涅槃二邊處四離唯滅惑障知足行處五離不觀利益衆生事任無餘涅槃處聲聞智慧與菩薩智慧差別云何應知由無分別差別不分別陰等諸法門故由非一分差別通。

達二空真如入一切所知相故依止一切衆  
生利益事故由無任差別任無任處涅槃故  
由恒差別於無餘涅槃不墮斷盡邊際故由  
無上差別實無異乘勝此故此中說偈  
由智五勝異 依大悲修福 世出世富樂  
說此不爲遠

若菩薩於世間實有亦復可知若菩薩如此  
依戒定慧學功德聚相應至十種自在於一  
切利他事得無等勝能云何於世間中見有  
衆生遭重苦難由菩薩見彼衆生有業能感  
苦報障勝樂果故由菩薩見如此若施彼樂  
具則障其生善由菩薩見彼無樂具能現前



厭惡生死由菩薩見若施彼樂具則是生長  
一切惡法因緣由菩薩見若施彼樂具則是  
逼害餘無量衆生因緣是故菩薩不無如此  
能世間亦有如此衆生顯現此中說偈

見業障礙善

厭現及惡增

害他彼衆生

不感菩薩施

攝大乘論學果寂滅勝相第九

如此已說依慧學差別云何應知寂滅差別  
諸菩薩惑滅即是無任處涅槃此相云何捨  
離惑與不捨離生死二所依止轉依爲相此  
中生死是依他性不淨品一分爲體涅槃是  
依他性淨品一分爲體本依者是具淨不淨

品二分依他性轉依者對治起時此依他性  
由不淨品分永改本性由淨品分永成本性  
此轉依若略說有六種轉一益力損能轉由  
隨信樂位任聞熏習力故由煩惱有著行暫  
弱行或永不行故二通達轉謂已登地諸菩  
薩由真實虛妄顯現為能故此轉從初地至  
六地三修習轉由未離障人是一切相不顯  
現真實顯現依故此轉從七地至十地四果  
圓滿轉由已離障人一切相不顯現清淨真  
如顯現至得一切相自在依故五下劣轉由  
聲聞通達人無我故由一向背生死為永捨  
離生死故六廣大轉由菩薩通達法無我故



於中觀寂靜功德故為捨不捨故若菩薩在  
下劣轉位有何過失不觀衆生利益事故過  
離菩薩法與下乘人同得解脫此為過失諸  
菩薩若在廣大轉位有何功德於生死法中  
由自轉依為依故得諸自在於一切道中能  
現一切身於世間富樂及於三乘由種種教  
化方便勝能安立彼於正教是廣大轉功  
德此中說偈

於凡夫覆真

於彼顯虛妄

於菩薩一向

捨虛顯真實

不顯現顯現

虛妄及真實

是菩薩轉依

解脫如意故

於生死涅槃

若智起等等

生死即涅槃

二無此彼故

是故於生死。非捨非非捨。於涅槃亦不  
無得無不得。

攝大乘論智差別勝相第十

如此已說寂滅差別云何應知智差別由佛  
三身應知智差別一自性身二受用身三變  
化身此中自性身者是諸如來法身於一切  
法自在依止故受用身者諸佛種種土及大  
人集轉依止所顯現此以法身為依止諸佛  
土清淨大乘法受樂受用因故變化身者以  
法身為依止從任兜率陀天及退受生受學  
受欲塵出家往外道所修苦行得無上菩提  
轉法輪大般涅槃等事所顯現故諸佛如來



所有法身其相云何若略說其相應知有五種此中說鬱陀那偈

相證得自在 依止及攝持 差別德甚深

念業明佛身

五相者一法身轉依為相一切障及不淨品分依他性滅已解脫一切障於一切法得自在為能清淨性分依他性轉依為相故二白淨法為相由六度圓滿於法身至得十種自在勝能為相故何者為十一命自在二心自在三財物自在此三由施度圓滿得成四業自在五生自在此二由戒度圓滿得成六欲樂自在由忍度圓滿得成七願自在由精進

度圓滿得成八通慧自在在此五通所攝由定  
度圓滿得成九智自在十法自在在此二由般  
若波羅蜜圓滿得成三無二為相由無有無  
二相故一切法無所有空相不無為相故復  
次有為無為無二為相非惑業集所生故由  
得自在能顯有為相故復次一異無二為相  
諸佛如來依止不異故由無量依止能證此  
故此中說偈  
我執不有故 於中無依別 如前多依證  
假名說不一 性行異非虛 圓滿無初故  
不一無異故 不多依真如  
四常住為相真如清淨相故昔願引通最為



極故應作正事未究竟故五不可思議爲相  
是真如清淨自證智所知故無譬喻故非覺  
觀行處故

復次此法身證得云何是觸從初所得由緣  
相雜大乘法爲境無分別智無分別後所得  
智五相修成熟修習於一切地善集資糧能  
破微細難破障故金剛譬三摩提即此三摩  
提後滅離一切障故是時由依止轉成證得  
應知此法身有幾自在於中得自在若略說  
有五自在於中得自在一淨土顯示自身相  
好無邊音不可見頂自在由轉色陰依故二  
無失無量大安樂住自在由轉受陰依故三

具足一切名字文句聚等中正說自在由轉  
想陰執相差別依故四變化改易引攝大集  
塗白淨品自在由轉行陰依故五顯了平等  
迴觀作事智自在由轉識陰依故  
此法身應知為幾法依止若略說唯三諸佛  
如來種種任處依止故此中說偈  
諸佛如來受五喜  
二乘無喜由不證  
由能無量作事立  
得喜最勝無有失  
種種受用身依止為成熟諸菩薩善根故種  
種化身依止為多成熟聲聞獨覺善根故有  
皆因證得自界故  
求喜要須證佛界  
由法美味欲得成  
諸佛恒見四無盡



幾種佛法應知。攝此法身若略說有六種。一  
清淨類法由轉阿梨耶識依故。由證得法身  
故。二果報類法由轉有色根依故。由證得果  
報勝智故。三任類法由轉受行欲塵依故。由  
無量智慧任故。四自在類法由轉種種業等  
攝自在依故。由於一切十方世界無闕六通  
智自在故。五言說類法由轉一切見聞覺知  
言說依故。由能飽滿一切衆生心正說智自  
在故。六拔濟類法由轉一切灾橫過失拔濟  
意依故。由一切衆生灾橫過失拔濟智自在  
故。如此六種類法所攝諸佛如來法身應知。  
諸佛法身為可說有差別為無差別由依止

意用業無異故應知無差別由無量正覺等  
事故應知有差別如法身受用身亦由依  
止業不異故應知無差別不由依止差別故  
無差別無量依止轉依故變化身應知如受  
用身

此法身應知與幾種功德相應與最清淨四  
無量相應與八解脫八制入一切入無護  
三摩提願智四無礙解六通慧三十二大人  
相八十小相四種一切相清淨十力四無畏  
四無護三念處拔除習氣無忘失法大悲十  
八不共法一切相最勝智等諸法相應此中  
說偈



於衆生大悲  
離諸結縛意  
不離衆生意

利樂意頂禮  
解脫一切障  
降伏世智者

應知智遍滿  
心解脫頂禮  
諸衆生無餘

能滅一切惑  
害惑有染汙  
常憐愍頂禮

無功用無著  
無礙恒寂靜  
一切衆生難

能釋我頂禮  
於依及能依  
應說言及智

於能說無礙  
說者我頂禮  
故隨彼類音

行往還出離  
證知諸衆生  
正教我頂禮

諸衆生見尊  
信敬調勝士  
由他見能生

淨心我頂禮  
攝受住及捨  
變化及改性

得定智自在  
世尊我頂禮  
方便歸依淨

於中障衆生  
於大乘出離  
摧魔我頂禮

智滅及出離

障事能顯說

於自他兩利

降邪我頂禮

無制無過失

無染濁無住

於諸法無動

無戲論頂禮

於眾伏他說

二惑所遠離

無護無忘失

攝眾我頂禮

於利益他事

尊不過待時

所作恒無虛

無迷我頂禮

於一切行住

無非圓智事

遍知一切世

實體我頂禮

日夜六時觀

一切界眾生

與大悲相應

利樂意我禮

由行及由得

由智及由事

於一切二乘

無等我頂禮

由三身尊至

具相無上覺

一切法他疑

能除我頂禮

無繫無過失

無塵濁無住

於諸法無動

無戲論頂禮



諸佛法身不但恒與如此等功德相應復與  
餘功德相應謂自性因果業相應行事功德  
相應是故應知諸佛法身有無上功德此中  
說偈

尊成就真如

修諸地出離

至他無等位

解脫諸衆生

無盡等功德

相應現於世

於三輪易現

難見人天等

復次如來法身甚深最甚深此甚深云何可

見此中說偈

佛無生為生

以無任為任

作事無功用

第四食為食

不異亦無量

無數量一事

最堅不堅業

無上應三身

無一法能覺

一切無不覺

一一念無量

有不有所顯

無欲無離欲

依欲得出離

已知欲無欲

故入欲法如

諸佛過五陰

於五陰中住

與陰非一異

不捨陰涅槃

諸佛事相雜

猶如大海水

我已正應作

他事無是思

由失尊不現

如月於破器

遍滿諸世間

由法光如日

或現得正覺

或涅槃如火

此二實不有

諸佛常住故

如來於惡事

人道及惡道

於非梵行法

住第一住我

佛一切處行

亦不行一處

於一切生現

非六根境界

諸惑已滅伏

如毒呪所害

留惑至惑盡

佛證一切智

諸惑成覺分



生死爲涅槃。得成大方便。故佛難思議。  
由此義故十二種甚深。應知謂生不任業。任  
甚深。安立數業甚深。正覺甚深。離欲甚深。陰  
滅甚深。成熟甚深。顯現甚深。菩提般涅槃顯  
現甚深。任甚深。顯自體甚深。滅惑甚深。不可  
思議甚深。

諸菩薩緣法身憶念佛。此念緣幾相若。略說  
諸菩薩依法身修習念佛。有七種相。何等爲  
七。一諸佛於一切法。至無等自在。如此修習  
念佛於一切世界。至得無礙無邊六通智。故  
此中說偈  
被障因不具。一切衆生界。住二種定中。

諸佛無自在

二如來身常任由真如無間解脫一切垢故  
三如來最無失一切惑障及智障永相離故  
四一切如來事無功用成不由功用恒起正  
事永不捨故

五如來大富樂位一切佛土最微妙清淨為

富樂故

六如來最無染著出現世間非一切世法所  
染如塵不能染空故

七如來於世間有大事用由現成無上菩提  
及大般涅槃未成熟衆生令成熟已成熟衆  
生令解脫故此中說偈



隨屬如來心 圓德常無失 無功用能施

衆生大法樂 遍行無有礙 平等利多入

一切一切佛 智入緣此念

復次諸佛如來淨土清淨其相云何應知如

言百千經菩薩藏緣起中說佛世尊在周遍

光明七寶莊嚴處能放大光明普照無量世

界無量妙飾界處處各各成立大域邊際不可

度量出過三界行處出出世善法功能所生最

清淨自在唯識爲相如來所鎮菩薩安樂住

處無量天龍夜叉阿脩羅迦樓羅緊那羅摩

睺羅伽人非人等所行大法味喜樂所持一

切衆生一切利益事爲用一切煩惱災橫所

雖非一切魔所行處勝一切莊嚴如來莊嚴  
所依處大念慧行出離大奢摩他毗鉢舍那  
乘大空無相無願解脫門入處無量功德聚  
所莊嚴大蓮華王為依止大寶重閣如來於  
此中住如此淨土清淨顯色相圓淨形貌量  
處因果主助眷屬持業利益無怖畏住處路  
乘門依止圓淨由前文句如此等圓淨皆得  
顯現復次受用如此淨土清淨一向淨一向  
樂一向無失一向自在

復次諸佛法界恒時應見有五業一救濟災  
橫為業由唯現盲聾狂等疾惱災橫能滅除  
故二救濟惡道為業從惡處引拔安立於善



處故三救濟行非方便為業諸外道等加行  
非方便降伏安立於佛正教故四救濟行身  
見為業為過度三界能顯導聖道方便故五  
救濟乘為業諸菩薩欲偏行別乘未定根性  
聲聞能安立彼為修行大乘故於如此五業  
應知諸佛如來共同此業此中說偈

因依事意及諸行

異故世間許業異

此五種異於佛無

是故世將同一業

若尔聲聞獨覺非所共得如此眾德相應諸  
佛法身諸佛以何意故說彼俱趣一乘與佛  
乘同此中說偈

未定性聲聞及諸餘菩薩於大乘引攝

定性說一乘 法無我解脫 等故性不同

得二意涅槃 究竟說一乘

三世諸佛若共一法身云何世數於佛不同

此中說偈

於一界中無二故

同時因成不可量

次第成佛非理故

一時多佛此義成

云何應知諸佛法身非一向涅槃非非一向

涅槃此中說偈

由離一切障

應作未竟故

佛一向涅槃

不一向涅槃

云何受用身不成自性身由六種因故一由

色身及行身顯現故二由無量大集處差別



顯現故三隨彼欲樂見顯現自性不同故四  
別異別異見自性變動顯現故五菩薩聲聞  
天等種種大集相雜和合時相雜顯現故六  
阿黎耶識及生起識見轉依非道理故是故  
受用身無道理成自性身云何變化身不是  
自性身由八種因故一諸菩薩從久遠來得  
無退三摩提於兜率陀天道及人道中受生  
不應道理二諸菩薩從久遠來恒憶宿任命方  
書筭計數量印相立巧等論行欲塵及受用  
欲塵中菩薩無知不應道理三諸菩薩從久  
遠來已識別邪正法教往外道所事彼爲師  
不應道理四諸菩薩從久遠來已通達三乘

聖道正理爲求道故修虛苦行不應道理五  
諸菩薩捨百拘胝閻浮提於一處得無上菩  
提及轉法輪不應道理六若離顯無上菩提  
方便但以化身於他方作佛事若尔則應於  
兜率陁天上成正覺七若不尔云何佛不於  
一切閻浮提中平等出現若不於他方出現  
無阿含及道理可證此義八二如來於一世  
界俱現此不相違若許化身成多由四天下  
攝一世界如轉輪至於一世界或一主或別  
主俱生不應道理諸佛亦尔此中說偈  
佛微細化身 多入胎平等 爲顯具相覺  
於世間示現



有六種因諸佛世尊於化身中不得永住一  
正事究竟故由已解脫成熟衆生故二若已  
得解脫求般涅槃為令彼捨般涅槃意欲求  
得常住佛身故三為除彼於佛所有輕慢心  
故為令彼通達甚深真如法及正說法故四  
為令衆生於佛身起渴仰心數見無厭足故  
五為令彼向自身起極精進由知正說者不  
可得故六為令彼速得至成熟位向自身不  
捨荷負極精進故此中說偈  
由正事究竟 為除樂涅槃 令捨輕慢佛  
發起渴仰心 令向身精進 及為速成熟  
諸佛於化身 許非一向住

為度一切眾生由發願及修行尋求無上菩提  
提一向般涅槃此事不應道理本願及修行  
相違無果故

復次受用身及變化身無常故云何諸佛以  
常住法為身由應身及化身恒依止法身故  
由應身無捨離故由化身數起現故如恒受  
樂如恒施食二身常住應如此知若法身無  
始時無差別無數量為得法身不應不作功  
用此中說偈

諸佛證得等無量

是因眾生若捨勤

證得恒時不成因

斷除正因不應理

阿毗達磨大乘藏經中名攝大乘此正說究



竟

攝大乘論卷下十

漚和此上烏侯反撰先節反

閉閉二同闕礙二同蓋反

策策

二同楚

婁

音橫

曰

